

Elisabeth Cavegn-Gasser, Camischolas



A Nunningen, cantun Solothurn, eis ella naschida ils 12 d'uost 1932. Ses geniturs ein stai Pius ed Emma Gasser. Ella ei carschida si el ravugl da tschun fargliuns. Igl ei buca gest stau lev lezs onns, ils onns d'uiara. Quels onns da miseria han formau la trapassada. Strusch bandunau la scola ha ella surpriu responsabladad pils pli pigns fargliuns. Ella ha luvrau sco vendidra e plitard anflau grond plascher ella gastronomia.

Igl onn 1956 fa ella enconuschienscha cul giuven tujetschin Serafin Cavegn. Ord la ventireivla letg neschan e creschan si sis affons.

Suenter paucs onns bandunan els il decasa a Basel e serendan ord encarschadetgna per la patria a Zignau e plitard a Trun. Lezs onns ha ella acquistau la patenta d'ustiera ed aschia saviu ademplir in giavisch dil cor. Silsuenter ei la famiglia serendida a Breitenbach e surpriu in menaschi da gastronomia. Plitard suonda ella siu um anavos en sia patria, en Tujetsch. Biabein in decenni daventa ella ustiera ella ustria alpestra da Planatsch, ina ustiera respectada e cun grond engaschi.

Suenter la surdada dalla fatschenta al fegl, sperava la trapassada sin in temps pli ruasseivel cun dapli temps pigl um, affons e beadis sco era pils biars hospes da vacanzas. Denton, cuort avon la fin digl onn 1991, vegr ella surprida d'ina maligna malsogna. Da quella po ella buca pli serevegnir. Ils 4 da zercladur 1992 cloma il Segner sia buna survienta a casia. Ella ruassi en pasch.